

- नागरिक उड्डयन मंत्रालय इंडिगो एयरलाइन ने उड़ान रद्द व्हेवण री सूरत मांय मुसाफिरां ने किराया रो चुकारो तुरत देवण रा हुकम दीना।
- राज्य मांय एसआईआर रा तैत वोटर लिस्टां ने डिजिटाइज करण रो काम पूरो व्हयो-राजस्थान देश मांय अक्वल।
- शिक्षा मंत्री मदन दिलावर कह्यो-भणार्इ-लिखाई रा लेवल मांय सुधार ऊं राजस्थान देश मांय 12 वीं ऊं तीजी ठोड़ माथे पूग्यो।
- संविधान समिति रा अध्यक्ष डॉ. भीमराव अम्बेडकर रा परिनिर्वाण दिवस रे मौके राज्य मांय श्रद्धांजलि कार्यक्रम राख्यी ज्या।

000

नागरिक उड्डयन मंत्रालय इंडिगो एयरलाइन्स ने मुसाफिरां रा किराया री बाकियात तुरत चुकावण रा हुकम दीना है। मंत्रालय साफ कीनो है के सगळी रद्द करीजी या अड़चन वाळी उड़ानां रा मुसाफिरां रा किराया रो चुकारो आज रात आठ बज्यां तांई पूरो व्हे जावणो चाहिजे। हवाई यात्रा कम्पनी ने उड़ान रद्द व्हेवण रे कारण सफर नी कर सक्या मुसाफिरां ऊं कोई पुनर्निर्धारण फीस नी लेवण रा ई हुकम दिया ज्या है। ई बीचे उड़ानां रद्द व्हेवण रे कारण परेशान मुसाफिरां रा सुबीता सारू उत्तर-पश्चिम रेलवे री ओर ऊं खास गाडियां चलाई जा रही है। एन.डब्ल्यू.आर. रा मुख्य जनसम्पर्क अधिकारी शशि किरण बतायो के उड़ानां रद्द व्हेवण रे कारण आया मुसाफिरां रा बत्ता भार ने ध्यान राखता थकां अ गाडियां चलायी ज्यी है।

000

राज्य मांय विशेष गहन पुनरीक्षण अभियान-एसआईआर रा तैत सगळी वोटर लिस्टां डिजिटाइज कर दीरीजी है। ई पाछे प्रदेश आखा देश मांय अक्वल बण ग्यो है। राज्य रा मुख्य निर्वाचन अधिकारी नवीन महाजन आ जाणकारी दीनी। वे बतायो के प्रदेश मांय 97 फीसदी ऊं बत्ता मतदातावां रो मिलान लारली वोटर लिस्टां ऊं कर लियो ज्यो है। महाजन बतायो के वोटर लिस्टां रो मजमून 16 दिसम्बर ने छाप्यो जावेला। ई पाछे आवता साल 15 जनवरी तांई दावा अर आपत्तियां करी जा सकेला। आं रा निपटारा पाछे 14 फरवरी ने फाइनल वोटर लिस्टां छापी जावेला।

000

वित्तमंत्री निर्मला सीतारामन कह्यो है के केंद्र सरकार कर प्रणाली ने आसान बणावण माथे काम कर रही है, जिण ऊं इन्कम टैक्स भरण रो काम आसान बण जावेला। वे नई दिल्ली मांय एक गैर-सरकारी मीडिया चैनल कानी ऊं राख्यी ज्या सम्मेलन मांय बोल रही ही। सीतारामन कह्यो के जनता रा भला सारू इन्कम टैक्स स्लेब ने बत्ती साफगोई सागे पालना लायक बणावणो जरूरी है। वे कह्यो के बेगो ई सीमा शुल्क कस्टम ड्यूटी ऊं जुड्या आमूल-चूल बदलाव कर्या जावेला।

000

केन्द्रीय सहकारिता मंत्री अमित शाह कह्यो है के सरकार डेयरी हलका मांय सर्कुलर इकोनॉमी मॉडल लागू कर र पशुपालकां री आमदनी मांय आवता पांच साल मांय बीस फीसदी री बधोतरी करण री कोशिश करेला। वे गुजरात रा सनादर मांय बनास डेयरी रा बायो-सीएनजी अर उर्वरक कारखाना रा उदघाटन रे मौके बोल रह्या हा। वे बनास डेयरी रा नुवा बणायी ज्या 150 टीपीडी दूध पाउडर अर शिशु आहार कारखाना रो भूमि पूजन ई कीनो।

000

सुप्रीम कोर्ट न्याय रा काम मांय आर्टिफिशियल इंटेलिजेंस-एआई रा इस्तेमाल मांय न्यायाधीशां कानी ऊं पूरी सावधानी राखण रो भरोसो दिरायो है। अदालत कह्यो के ऐडी तकनीक कदे ई अदालती फैसलां री प्रक्रिया माथे हावी नी व्हेवण दी जावेला। मुख्य न्यायाधीश सूर्यकांत अर न्यायमूर्ति जॉयमाल्या बागची री पीठ न्यायिक प्रणाली मांय एआई अर मशीन लर्निंग रा नियमन री मांग करण वाळी एक अर्जी माथे सुणवाई करता थकां ओ भरोसो दिरायो।

000

संविधान सभा रा अध्यक्ष डॉ. भीमराव अंबेडकर री बरसी रे मौके आज वां ने सिरधाभाव सागे याद कर्या जा रह्या है। ई मौके राज्य मांय ई न्यारा-न्यारा कार्यक्रम राख्यी ज्या। पाली, सवाईमाधोपुर, अजमेर अर बाड़मेर समेत केई ठोड़ां अंबेडकर सर्किल अर डॉ. अम्बेडकर री मूरत माथे सियासी पार्टियां अर सामाजिक संस्थावां रा कार्यकर्तावां री ओर ऊं फूल माळा चढ़ा र वां ने याद करी ज्या। ई मौके केई

ठोड़ां विचार—गोष्ठियां राखी ज्यी। पाली ज़िला रा देसूरी मांय नर्सज वेलफेयर सोसायटी री ओर ऊं खूनदान शिविर लगायी ज्यो।

000

शिक्षा अर पंचायतीराज मंत्री मदन दिलावर कह्यो है के राजस्थान लारला दो साल मांय भणार्ई—लिखाई रा हलका मांय सुधार कर र देश मांय 12वीं ऊं तीजी ठोड़ माथे आ ग्यो है। वे आज टोंक मांय पीएम श्री केन्द्रीय विद्यालयां रा प्रधानाचार्यां री तीन दिन री आमुखीकरण कार्यशाला मांय बोल रह्या हा। मंत्री कह्यो के भणार्ई—लिखाई मानवीय मूल्यां अर चरित्र निर्माण रो आधार व्हेवणो चाहिजे। वे शिक्षकां ऊं बच्चां मांय किताबी ज्ञान सागे व्यवहारिक ज्ञान विकसित करण बाबत् कह्यो।

000

जयपुर मांय 10 दिसम्बर ने राख्या जावण वाळा प्रवासी राजस्थानी दिवस जळसा मांय माइनिंग हलका रा बारा मांय खास सत्र राख्यो जावेला। खान विभाग रा प्रमुख शासन सचिव टी. रविकान्त आ जाणकारी दीनी। वे बतायो के इण रो मकसद राजस्थान ने ज़मीं हेटे ऊं खनिज निकालबा रा मामला मांय देश रो खास हलको बणावणो है। रविकान्त कह्यो के इण मांय प्रवासी राजस्थानियां री सक्रिय भागीदारी तैय करी जावेला। सत्र रे दौरान लिथियम, रेयर अर्थ एलिमेंट्स ज़मीं हेटे ऊं निकालबा अर खनिजां ने साफ करण रा हलकां मांय निवेश माथे ज़ोर दियो जावेला।

000

जनता रा सुबीता ने और बधावण सारू मोबाइल एप ई—मित्र ने और बेहतर बणायी ज्यो है। म्हाणा पाली खबरनवीस बतायो के इण ऊं जनता ने घर बैठ्या ई आसान सेवावां मिल सकेला।

000

सवाईमाधोपुर मांय नगर परिषद रा दफतर समेत 24 भवनां माथे सूरज री रोशनी ऊं बिजली बणावण री मशीनां लगावण री योजना बणायी ज्यी है। म्हाणा खबरनवीस बतायो के ई सारू नगर परिषद् री ओर ऊं स्थानीय निकाय निदेशालय ने विगतवार प्रस्ताव भेजी ज्यो है।

000

11वों भारत अंतर्राष्ट्रीय विज्ञान महोत्सव आज हरियाणा रा पंचकूला मांय सारू व्हयो। विज्ञान अर प्रौद्योगिकी मंत्रालय री ओर ऊं राखी ज्यो ई महोत्सव रो उद्घाटन केंद्रीय विज्ञान अर प्रौद्योगिकी मंत्री डॉ. जितेंद्र सिंह हरियाणा रा मंत्री श्री कृष्ण बेदी सागे कीनो। ई मौके डॉ. सिंह कह्यो के ऐड़ा आयोजनां रो मकसद नौजवानां ने भणा—पढ़ा र विज्ञान री उपलब्धियां रो उत्सव मनावणो है। ई महोत्सव रो खास मुद्दो **“विज्ञान से समृद्धि: आत्मनिर्भर भारत के लिए”** राखी ज्यो है। ई मौके लारला दिनां अंतरिक्ष मांय जा र आया भारत रा ग्रुप कैप्टन शुभांशु शुक्ला नौजवानां सागे बातचीत करता थकां कह्यो के भारत विज्ञान रा हलका मांय खुद रे पाण ऊबो व्हे रह्यो है।

000

करौली रा ज़िला कलेक्टर नीलाभ सक्सेना आज खाद—बीज री केई दुकानां री औचक जांच कीनी। ई मौके वे दुकानदारां ने केवल मानक अर प्रामाणिक खाद—बीज ही बेचण सारू कह्यो। कलेक्टर अहलकारां ने ई गड़बड़ियां करण वाळां रे खिलाफ करड़ी कार्रवाई करण अर लगातार जांच करण रा हुकम दीना।

000

राजस्थान गृह रक्षा विभाग रो 63वों स्थापना दिवस समारोह जयपुर रा केंद्रीय प्रशिक्षण संस्थान मांय मनायी ज्यो। ई मौके खास पावणी आई.पी.एस. अहलकार मालिनी अग्रवाल परेड री सलामी लीनी अर बेहतर सेवा देवण वाळा अहलकारां अर कर्मचारियां ने डीजीसीडी कमेन्डेशन डिस्क दे र नवाजा। 21 कर्मचारियां रो महानिदेशक प्रशस्ति पत्र दे र मान करी ज्यो। ई मौके चित्तौड़गढ़ रा गृह रक्षा प्रशिक्षण केन्द्र मांय झंडो फहरायी ज्यो। स्थापना दिवस सप्ताह रा तैत वटे **“करो योग—रहो निरोग”** योगाभ्यास, रस्सा—कस्सी, भाला फेंक, गोला फेंक, वाहन जागरूकता रैली अर स्वच्छता अभियान रा तैत न्यारा—न्यारा कार्यक्रम राखी ज्यो।

000

नागौर मांय **‘आपकी पूंजी —आपका अधिकार’** अभियान रा तैत हाल ताई 430 जणां ने बिना दावा वाळा खातां री 1 करोड़ 48 लाख रूप्या री रकम पाछी दे दीरीजी है। भारतीय रिजर्व बैंक अर वित्तीय सेवा विभाग री ओर ऊं राखी ज्यो कार्यक्रम मांय आरबीआई रा क्षेत्रीय निदेशक नवीन नांबियार अर ज़िला कलेक्टर अरुण कुमार पुरोहित री मौजूदगी मांय आ जाणकारी दीरीजी। नांबियार बिना दावा वाळा खातां ऊं जुड़ी रकम पाछी हासिल करण री आसान प्रकिया समझाई।

000

चूरु मांय चलाया जा रह्या अभिनव पहल अभियान रा तैत आज ज़िला कलेक्टर रा रेहवास माथे पुस्तक संवाद रो कार्यक्रम राख्यी ज्यो। इण मांय मोटी तादाद मांय अध्यापक, विद्यार्थी अर वां रा मायत शामिल व्ह्या। ई मौके ज़िला कलेक्टर विद्यार्थियां सागे बातचीत कीनी अर वां रो मान कीनो।

000

सलूंबर रा जिला कलेक्टर अवधेश मीना ज़िला मांय विकास रा कामां सारु डिस्ट्रिक्ट मिनरल फाउंडेशन ट्रस्ट –डीएमएफटी फंड ऊं 107 करोड़ 47 लाख रुप्या री माली मंजूरी दीरीजी है। ई रकम ऊं शिक्षा विभाग रा 324 कामां माथे 36 करोड़ 29 लाख, पीडब्ल्यूडी रा 28 कामां माथे 32 करोड़ 55 लाख, ईलाज ऊं जुड़्या 124 कामां माथे 14 करोड़ 60 लाख अर पंचायती राज विभाग रा 59 कामां माथे 11 करोड़ 15 लाख रुप्या खर्च कर्या जावेला। ई रे अलावा टीएडी, महिला अर बाल विकास, पीएचईडी अर वन विभाग मांय ई विकास रा काम मंजूर करी ज्या है।

000

पाली ज़िला मांय रोहट ब्लॉक रा कलाली गांव मांय ब्लॉक समूह स्तर री खेलकूद होड़ां राख्यी ज्यी। मेरा युवा भारत री ओर ऊं नौजवानां मांय खेल ने रोजमर्रा री जिन्दगी रो हिस्सो बणावण, वां रा शारीरिक अर मानसिक स्वास्थ्य ने मजबूत बणावण अर फिट इण्डिया रा मकसद ऊं अ खेल राख्यी ज्या।

000